

焦氏澹園集

焦氏澹園集卷之二十二

書後題跋

國子監奉 旨刊十三經注疏先進孝經跋語

秦人焚書孝經爲河間人顏芝所藏漢初芝子貞出之凡十八章而長孫氏江翁后蒼翼奉張禹皆名其學又有古文孝經與古文尚書同出而長孫有閨門一章其餘經文大校相似又有衍出三章并前爲二十二章孔安國爲傳至劉向典校經書

以顏本比古文除其煩惑以子八章爲定鄭衆馬
融並爲之注梁代安國及鄭氏二家並立學官未
幾而安國之本亡隋秘書監王邵自云於京師得
之以示劉炫炫因述其義疏講於人間其實炫僞
作也炫以妄造連山魯史記除名獨是經爲可信
哉今上念士敝於俗學閔焉以經術造之命辟
雍重訂十三經注疏於是孝經適成而臣敬題其
後經自孔子迄於今二千餘祀學者所覩記無復
全書於是時也欲校而復之知其難也以校而復
全書於是時也欲校而復之知其難也以校而復

之之難而知先王至德要道燦然明於天下之尤
難然竊謂孝生於人心經特以發明之而已故曰
孝順德也聖人則天明因地義以順天下而豈其
強之哉孝不明則順德塞順德塞則王化湮所謂
以順則逆民無則也 上動遵祖憲嚴奉 兩宮
孝治之風光於四海亹亹乎嚮無恩不服之世矣
乃命承學之臣刊布遺經嘉與天下共之顧臣如
爝火焉詎足以庶大明之光仰承盛美不敢不自
効也注疏幾卷總若干萬言上之 御府以待

制詔頒焉謹跋

書曲洧舊聞後

向與新安朱君正民游嘗以其先奉使公傳及行
狀見遺公使金十五年能全節而歸宋史與張邵
洪皓同稱其奉送徽宗大行文一時華夷傳誦其
人可以想見也李任道編雲館二星集以公與宇
文虛中同載虛中仕金而公以歿自守不幾於老
子申韓同傳也哉公自爲一詩題其後絕域山川
飽所經客蓬歲晚任飄零詞源未得窺三峽使節

何容比二星蘿葛施松慙弱質兼葭倚玉怪殊形
齊名李杜吾安敢千載公言有汗青公之微意亦
自可見恨姦檜當軸不得如子卿圖形麟閣而僅
轉奉議郎一官痛哉所著有聘游集四十二卷奏
議一卷尚書直解十卷曲洧舊聞三卷續骭骯說
一卷雜書一卷風月堂詩話三卷新鄭舊詩一卷
南歸詩文一卷何時得盡見之以爲一快

題般若照真論

世法可名般若不可名非有般若不可名不可名

卽般若耳而人多強名之黃面老子說般若至六百卷般若心至二百六十言已是逗漏不少月川澄公復取而詮釋之如以楮墨描畫太虛世鮮見月忘指之人又增一重纏蓋雖然楮墨本空文字非實未獲魚兔難廢筌蹄則謂此編爲善學者之鞭影可也余故不辭而題其首

書李維明尺牘

此余友李維明寄其徒別駕趙君手筆也維明爲客部時應接旁午每書及余皆小楷自書其精謹

如其爲人卽謂書可以觀人豈不宜哉且真意滿紙不爲寒暄泛常語蓋其人足以廉頑立懦故讀之使人廩廩生氣世之小人立身不端而欲以言語字畫求工是不知本矣然譬之箜篌不有妙指誰發妙音觀者卽以此知趙君可也

書鹽鐵論後

自世猥以仁義功利岐爲二塗不知卽功利而條理之乃義也易云理財正辭禁民爲非曰義而豈以棄財爲義哉桑弘羊嘗武帝兵興爲三法以廢

之中如酒榷誠末事矣乃諸當輸官者令各輸主
所饒平其直於他所貨之輸者既便官有餘利亦
善法也至筦山澤之利置鹽鐵之官真不益賦而
用饒柰何病之劉彤有云古費多而民不傷今用
少而下轉困非他古取山澤今取貧民取山澤則
公利厚而人歸於農取貧民則公利薄而民去其
業此亦足以發明漢法之當遵用矣古先王山海
有官虞衡有職輕重有術禁發有時一厚農一足
國桑大夫蓋師其餘意而行之未可以人廢也藉

第令畫餅療饑可濟於實用則賢良文學之談爲甚美庸詎而必區區於此哉

書甘生家藏先賢手札卷

甘生丙從余游一日出其先大父蓮坪公交游尺牘令余題之大率當時名公卿之筆余平生所願見而不可得者何其幸也讀之語意諄切悉以學業相規勸不爲近世諛言一時古風可以想見語云不知其人觀其友卽此而蓮坪公之爲人何如哉生莫世寶之

又

此蓮坪公郡中諸交游筆也吉安爲古節義之鄉入國朝而理學獨盛觀卷中自整菴以至雙江其于名理多所悟入非苟而已者雙江先生云近世以義襲爲集義以知識爲良知以推致爲格物其於學者尤足以鍼膏肓而起痼疾也余辱在東郭先生之裔頗聞其家學獨未覩雙江語耳今讀之不覺欷然生其勉之求無愧於鄉先達可也

題孫過庭書千字文後

昔人評孫書謂千字一律如風偃草意輕之也全
謂書譜雖運筆爛熟而中藏軌法故自森然頃用
卿出千文真蹟觀之尤可以見晉人用筆之意禪
門所稱不求法脫不爲法縛非入三昧者殆不能
辦此用卿其永寶之

題胡太史書心經後

胡懋禮舊爲金陵名品行艸出二王父子隸書取
未多見此本規摹元常大令古雅中天趣溢發尤
難得也惟中刻置僧寮與同好者共之其用心甚

美因屬余題數語其尾惟中余兄靈山令伯賢子
壻文雅喜事觀其所好可以知其人焉

題類林後

余少嗜書苦家貧不能多致時從人借本諷之顧
性穎愚隨諷隨忘有未盡忘者往來胸臆又不能
舉其全爲恨表聖之詩不云乎亡書久似意良弼
真余意中事也庚辰讀書有感葛稚川語遇會心
處輒以片紙記之甫二歲計偕北上因罷去殘藁
委於篋笥塵埃漫滅不復省視久矣李君士龍見

之謂其可以資文字之引用備遺忘之萬一也乃
手自整理取世說篇目括之其不盡者括以他目
譬之溝中之斷文以青黃則士龍之爲也嗟乎古
之學者提要鉤玄率所不廢顧余之寡昧愧非其
人第割裂成書破碎大道爲博雅之訾而已書凡
若干卷其大意具編纂一篇故綴之卷首

題謝康樂集後

謝康樂集世久不傳其見文選者詩四十首止耳
後李獻吉增樂府若干首黃勉之增若干首晉書

沈道初先生冥搜博訪復得賦若干首詩若干首
雜文若干首譬之袁虬龍之片甲集旃檀之寸枝
總爲奇香異采不可弃也輯成合刻之而以校事
委余余讀之歎曰嗟乎詩至於此又黃初正始之
一大變也弃淳白之用而騁丹艷之奇離質木之
音而競宮商之巧豈非世運相乘古樸易解卽謝
客有不得自主者耶然殷生言文有神來氣來情
來摹畫於步驟者神贊雕刻於體句者氣局組綴
於藻麗者情酒康樂雕刻組綴竝擅工奇而不一

三敝者神情足以運之耳何者以興致爲敷敘點綴之詞則敷敘點綴皆興致也以格調寄俳章偶句之用則俳章偶句皆格調也以故美藻初日惠休揖其高標錯彩鏤金顏生爲之郤步非此故歟不然李唐以來類欲攀屈宋之逸駕薄齊梁之後塵矣遽使之規跡古風配陶凌謝其可乎余觀弘正一二作者類遺其情而模古之詞句迨其下也又模模之者之詞句本之不碩而第繁其枝欲其有可食之實可匠之材難矣以彼知爲詩不知其

所以詩也然則是集不可無傳而於今也爲尤甚
故於校讐既竣而爲發明先生之意如此

恭題兩朝諭祭文後

往營三殿采木之役命藩臣王重光董之事甫竣
而卒於蜀 肇皇帝閔其以歿勤事贈官諭祭哀
榮備至萬曆甲午配劉淑人祔將啓重光賜墓而
窆焉 今上復遣撫臣諭祭於其家嗣孫象乾旣
手奉璽書尊藏惟謹又集柳公權書爲副墨刻之
貞珉而間以示臣臣觀人臣入官數十載或間被

璽書之寵而得之身後者爲難幸得之身後矣而
遭際兩朝綸音再錫者爲尤難漢武帝以手書賜
莊助且載之史冊以爲美談況我二聖睿文炳
煥經緯圖書而重先夫婦其名行在奎璧光芒之
中并藉以不朽誠千載一遇已臣職在國史當備
述主上嘉與臣工風厲四海者以詔來世輒因
象乾之請恭書於下方令觀者聳然而作如聽屬
車之音與瞻太微之先以相與勉爲忠孝亦所以
勸也

書王氏集古帖後

嘗謂馬記班書文詞瑰瑋至今道史漢時事千載如新也魏晉以來名卿才大夫非盡乏人而不桂遷固之筆雖其人材卓犖隨世湮沒者多矣然則詞其可已哉然亦有撰著未工而托字畫以傳者後世撫斷碑殘碣而因以想見其人亦不遂至於泯絕王氏自太僕公崛起迨今冠冕蟬聯名德輩出爲海內第一中丞公取志傳碑銘集古法書爲一帙自此王氏世德與文章字畫競爽於長山祝

阿之間何其盛哉集字始梁周興嗣而至唐彌盛
今絕未有聞中丞公自出己意成之令古人名蹟
粲然楮墨間尤可寶也

書信國畫像并墨蹟後

二帖四詩皆文山先生手蹟帖中吉甫爲聾心遠
如心爲陳文龍其人品皆先生所推重詩雖間有
殘闕然備載集中可考也晚宋賈蔡輩以詞翰名
家其遺蹟見者欲叱去之不屑一盼先生字畫蓋
平平耳至令人再拜聳觀如寶玉大弓蹄玩不忽

釋手乃知夫人是非之心常凜然也吁可不畏哉

書二劉公忠義祠記後

二劉公一爲宣教郎督府機宜帶行大府寺簿劉沐字淵伯一爲宣教郎帶行軍器監簿督府機宜劉子俊字民章皆信國鄉曲友也信國集中具言歸國時淵伯收部曲赴府會於汀空坑之敗遇害於隆興長子同日刑次子貢元死空坑亂兵第三幼子亦沒於廣一門忠義蓋無不備述獨不載民章爲昆弟豈自爲一劉氏邪民章招集敗亡詣行

府會於潮陽行府敗民章被執莫知所終亦未及就烹事也二人事皆信國所目擊宜得其真記當得之傳聞者耳祠祀二公以三子祔於義始備夫信國起廬陵一時同鄉景從者不啻數十人乃知忠義本性有亦貴有以漸劘而風厲之也噫孰謂師友而可少也哉

書四體心經

昔有禪師童時讀心經至無眼耳鼻舌身意手捫其面倏然生疑因而悟道卒爲佛門龍象今誰不

誦此經因疑生悟者寧有幾人甚者任其邪見破
毀律儀餘波末流無所不至佛道愈益大壞矣存
公近以四體心經見示欲刻示學者以廣津梁夫
口誦而心通手書而身踐皆佛事也觀者尚共勉
之無俾古德專美於前

書何僉憲公露鳴鳩亭壁

余友何公露自王父構亭于茲有鳩來巢今若干
年矣中間盛衰離合其變凡幾鳩獨依依不能去
公露義之而以名其亭余謂公露三世中四登甲

科爲都人士所豔鳩獨能識於未遇之始豈誠得氣之最先者歟且彼一得所歸至今以爲長子孫之所斯不獨鳩義乃其智也世猶謂鳩爲拙非余所知已

題陳純甫鵠居樓壁

陳君純甫築樓顏之曰鵠居觀者疑之君天機卓絕不入名法輒跡而超詣懸解浩浩乎放於南溟而未知其際也君也爲之鵠孰能爲之鵠雖然此直其寄耳苟得於性卽翹翔蓬蒿之間奚異搏扶

搗羊角而上哉故生龍伯之國則大爲憔僥諱人
則小爲芝於朽壤則短爲冥靈大椿則長惡知夫
孰小孰大鵬之非鶴而鶴之非鵬也傳云鶴不木
處而安蓋君業安之矣卽以名其居亦無不可

題陳少明詩

學書有臨摹二法摹如梓人作室梁棟榱桷悉據
準繩臨如雙鵠摩空翩翩浩蕩栖止各異蓋摹得
其形臨得其意自不同也至於得心應手神融象
滋無意而皆意不法而自法斯妙於書者已儻但

步趨古人而略不見我之筆意縱極工好未免奴
書之謂非名品也少明詩始期合轍終乃舍筏雖
其溫雅和適不見崖異而已之風骨意象時見於
其間令讀之者臺夢而不倦斯足以一振近日之
習於雅道豈小補哉若余之矜於昔而頽且放於
今也又不得以此而自文也已

書葛萬悅制義

一技所得雖以稅自列然必妙解投機精潛應感
則械用不存而神者受之詎可以輒跡求哉制義

以傳聖言有若畫然以似爲工今夫卷墨設色摹形取類皆按物得之豈知妙悟者索之造物之先凡賦形出象觸之天機待其見於胸中者濃纖疎澹分布而出矣然後假之手而寄色焉斯進於技已萬悅之於義第得其形似已邪余觀其丰容晝法間所爲使形者若可以意色得之噫亦工矣撫卷之餘謬題片語而歸之以見此雖小道非造其懸解取成於心者不易論也

題嵇叔夜帖

絕文書文徵仲以尾有右軍字疑爲逸少作此非
知書者張懷瓘言家有叔夜草寫此書常寶惜人
與兩紙王書不易繇此言之寔嵇之手跡特懷琳
臨倣之耳懷瓘又言王少縱逸乏丈夫之氣故評
草書登品者八人褚亞而王殿今以此卷並觀良
非過論唐人雙鈞下真蹟一等頃幸得見於京師
會四明王生以廓填擅場因命爲之本一自隨一
遺無功閒中時一展玩雨散風行頽然天放龍章
鳳姿猶若得其髣髴者無功其善有之

題鄧寒松詩卷

絳侯麾城陷堅在漢廷稱矯矯矣而一遇獄吏輒
茫然不知所厝寒松公以詿誤繫居室雍容不異
平日今觀其詞翰迺逸勁爽神采飛動對之廩廩
猶有生氣如云此身旣作男兒身須作人間第一
人又云君能長使天下安我雖幽處無戚顏此其
胸懷磊落當談笑死生之際而一置對何足以困
之公旣以功名終而嗣計部君道馭購其遺墨并
告身裝爲此卷以寓羨牆之思而屬余題其後夫

以公之爲人而未盡食其報其後之焜煌始未艾云

又

古云隋陸無武絳灌無文才之難全久矣薛仁貴韋孝寬經術詞筆上下古今不再見余觀寒松公墨蹟翩翩雋爽出姿態於矩矱之中譬之良馬春原蹀躞自賞不至作款段委頽之步豈不稱兼材哉戶部君裝爲一卷時以自隨此殆鄧氏之弓冶而非尋常詞翰埒也尚永寶之

跋甲申十同年圖

國朝人材之盛莫踰于 泰時殆彷彿都俞吁嘯
之風非獨近世所罕見而已正德之末國綱幾搖
而猶賴數公以維持之甚哉國之不可無君子也
此十人中忠宣文正恭簡莊懿文肅爲尤著而世
或以文正之不能去爲詬病不知大臣潔身易體
國難文正之逶迤其自靖無愧於諸公而功不啻
有什百焉者此豈尋常局曲之士所能及哉泌陽
事行士大夫所不道其裔孫辯晰縷縷顧無能信

之者豈孝子慈孫不能改者邪抑天下之惡皆歸之者邪是卷莊懿諸孫屯部君夢得持以見示恍然有不勝執鞭之慕者莊懿持三尺與漢廷于定國爭美其子孫自午塘秩宗而下功名之盛方出而未艾宜也因紀數語於後俾論世者知所考云

庸言跋

人非食不生非菽粟不食此其常也謬者釋之而山珍海錯之求顧暫御之則爽口久食之則爲病何者以山珍海錯可一御而不可以爲常也日用

飲食靡之而非道日用而不知者失則愚鄙失於
日用者失則鑿愚者昧道未爲害也而惟鑿爲可
惡吾師慮之以庸言相提激意蓋如此楊子雲論
聖言遠於天賢言近於地彼未知離地無天離近
無遠故也故子雲不知道噫安得知遠之近微之
顯者而與之讀庸言哉

題子昂書法華經後

世言子昂書初臨思陵中學鍾王晚師李北海亦
其大端耳書病至衆唯積學漸成以次解脫乃入

三昧世徒見公一種趁姿媚書而不知其他繇見
書不廣也此經爲公大德元年筆時自集賢出佐
濟南年財四十有三精謹道勁有初唐虞薛風與
餘書絕異相傳出毛宮保所藏諸鄉薦紳欲多方
購之以還其家而未果恩公偶得之將置長干奘
公塔院以充常住噫此經誠得其所歸而吉州諸
公其亦可息喙也夫

跋玉兔泉聯句詩後

洪武初以京兆學爲辟雍景濂先生過訪鄉人張

孟兼因爲免泉聯句詩命子仲珩書之泉上今不知所在久矣此卷仲珩續爲慈谿王允實書者藏友人陳廷評所學博張君屢正見之請刻石覺宮以存故事而屬余題其後夫學士父子文筆爲國朝第一無待余言獨慨斯泉久爲檜辱而名賢一加品題輒令人憮然若爲改觀者夫人是非之心不可磨滅如此張君揭之首善之地殆以垂多士之法戒而非獨爲詞翰重也觀者尚相與繹思之

題華祕書集

昔謝公勳名冠江左而子孫鵠起世擅雕龍有集
太傅而下歷宋齊梁陳十有六人詩三百四十餘
篇所謂蘭玉集是已錫山華氏自黃楊集出詩已
萌芽至學士公益光大之今復有秘書禮部二集
何其盛也秘書家富墳籍張華海內之秘班旂禁
中之副時得窺之故能收五際之長波駕四始之
芳躅落筆成詩自中音拍且也代遇昇平家傳簪
組卽不雨之雲密而未抒然旣成之韶變而彌雅
以故渾厚和平溫而有體眠彼子山之悲哀屈平

之怨刺雖不遇之所興覺自待之未厚矣王筠嘗自詡七葉之中冠冕蟬聯人人有集夫筠雖粗有文而七葉之集絕未有聞僧虔誠子書可考也然則秘書殆埒美謝庭而王氏不足道矣

題詞林人物考

論人之著作如相家觀人得其神而後形色氣骨可得而知也古之摛詞者不在形體結構在未有形體之先其見於言者托耳若索諸裁文匠筆聲應律合卽盡叶於古皆法之迹也安知其所以法

哉友人王赤岡氏耽玩秕文錯綜今古乃取昭代詞家人爲之傳以爲不得其神未可論其法不知其人未有能得其神者也其誦詩讀書而論其世之意歟王僧虔論書或其人可想或其法可存皆所不廢赤岡之多所據摭殆亦類此宋人好爲嚴論然三體詩至以杜常爲唐人洪容齋博雅名家所進萬首絕句宋詩攬入者什居二三彼其世之不知而何以論於神形離合之際然則是編也亦通今學古之津筏微獨脩詞者所當知而已

書金剛經解

達磨東來以楞伽四卷傳佛心印至黃梅始以金剛易之此諸佛之了義度生之津筏也解者無慮數十百家皆言以破相爲宗斷疑爲用然不達經旨至破相而離相斷疑而成疑者多矣夫卽心相而無分別心相頓空卽辨知而無能所辨知豈實而世人馳求不已只爲不了佛與衆生自心常寂妄計有心遂成河漢豈知清淨海中有一微塵可作修證不思議解猶爲說夢秋潭居士閱焉乃於

無法可說中橫說豎說總之發明此義同社諸君子謂其有破相之義亦有顯相之功有奪事之能實有成事之力蓋取之則兩傷離之則皆是也陳了翁謂年過五十卽當留意此經但日讀一遍其旨自明早知則早得力雖然豈獨年過五十者所當勉而已哉

題楊復所先生語錄

嶺南復所楊先生倡道金陵問學者屢常滿戶外二三高足弟子有契於中輒筆其話以傳今載錄

中者是已當是時溫陵李長者與先生狎主道盟
然先生如和風甘雨無人不親長者如絕壁巉巖
無罅可入二老同得法於旴江而其風尚懸絕如
此余以爲未知學者不可不見先生不如此則信
向靡從旣知學者不可不見長者不如此則情塵
不盡天生此兩人激揚一大事於留都非偶然也
今兩人往矣常吉輩旣刻長者問答復以先生語
屬余題其簡端嗟乎剝逝舟存鴻飛爪在然覽之
知諸君信道之篤與爲法之勤安知無透脫情境

者出於其間乎余故不辭而書之亦以見江南道德所在未全寂寥也

書漢延熹刻字

漢銅雀瓦稱爲最古在宋已不可得洪容齋言世所有皆高歡避暑宮氷井臺香姜閣瓦耳此碑有延熹字爲漢桓帝時物又遠在銅雀先矣前爲古篆後作分書古有其例昔臨淄得桐棺前和隱起爲銘齊太公六世孫胡公惟三字古文餘同漢隸此其類也末二字爲恒光恒從心當作四筆今楷

書特從省耳詞義闕略不可讀然使學者於千載
下得見古人之體法可謂世之一寶

書黃庭經後

攷之晉書逸少嘗書五千言遺道士非黃庭也然
陶隱居論書最覈言逸少有名之蹟不過數首黃
庭爲第一當是右軍自有別書特非換鵞經耳世
行殊乏善本新安汪太宰家藏僅具點畫而少氣
韻近且漸泐余鄉甘生賜掘土得茲石瑩潔如玉
筆意宛然真數百年物也一石蓋已損世代雖莫

考而決爲宋以前之刻無疑黃長睿云若無勝槩縱傳授有據亦無足取此本贊之華留一出而羣馬皆空學者當鑒以心目政不以耳食爲貴也甘爲金陵仕族御史霖歿遜國之難評事觀別駕節先後以甲乙科起家賜亦文雅精篆籀說者謂此石爲得所歸云

題集虞書王司徒墓表

此少司徒王公墓表今相國對南王先生所造先生於公所謂以法爲師弟子耳而以道相成者拳

奉不能忘讀其言可一倡而三歎也唐初去晉未
遠所存右軍行書二百四十紙懷仁會粹爲序時
謂逸少劇跡咸萃其中然必累年乃就歐陽信本
書距今九百歲鄭樵金石略二十有三種獨四三
帖在耳中丞鳩集成文遒勁茂美宛然孤峰拔起
四面削成之勢此文足稱二寶矣信本銜位書兼
太子率更令渤海男始備黃長睿言一八分碑稱
銀青光祿大夫給事中本傳不載余觀史叙信本
歷官自太常博士給事中弘文館學士皆具唐銀

青爲從二品散官給事中階五品自不相涉故世
行皇甫碑署銜有銀青無給事亦非分書也長睿
措擊六一考校非長而持論不無遺漏乃知昔人
目論之語不虛耳

書袁太史卷

道也者不可須臾離也可離非道也蓋上下四方
各有定位之東則離西之上則離下此可離也若
無之而非我無之而非道惡能離諸故以迷悟作
輒言者皆非也詩云民之質矣日用飲食夫日用

飲食又豈有作與輟哉學者日用不知不爲凝滯
所隔則爲聰明所亂於是身在高堂廣廈中日向
他人尋覓住處又如忘已之頭狂走呼號別求首
領古先生名爲可憐閔者莫大於此嘗記惟心訣
有言全體見前猶希玅悟從來具足仍待功成倘
知人人尋常日用無時不見前無人不具足又何必
鑽研故紙強生支節如蠶作繭自苦自縛袁先
生空野獨步如香象之絕儕高岸先登歎小孤之
未濟時一過而存予真大慈之用心也於其還楚

漫書數言以志別緒亭州有卓吾先生在焉試一
往訊之其有以開予也夫

書董子誠卷

子誠自水西至金陵與余邂逅僧寮子誠自述其
學時而覺照時而昏沈不能昏照一如也時而放
下時而提起放下則樂提起則苦不能攝散一如
也予曰覺照無自性昏沈亦無自性不必貴覺照
而賤昏沈也提起非有加放下非有減亦奚爲苦
提起而樂放下哉蓋此妙淨明心原無揀擇苟欲

妄爲取舍強加造作如以兩手撮摩虛空不待智者笑之矣從來門中自有向上一着子誠真有意於斯牆壁瓦礫能談無上妙理政不俟余喋喋也

書唐子張卷

子張爲學故自宛陵迎羅先生於金陵不可謂無志矣余與之遇一見言知余曰知爲常見是衆生法余不許再見言無知余曰無知爲斷見是二乘法余亦不許子張慚然如有失也余語之曰人心之妙囊括大虛不可以有無求不可以取舍得以

無求之者攝心獨坐一事不理靜中光景了了可
卽事物現前茫無湊泊大慧訶之爲默照邪禪是
也以有求之者認取識神以爲家寶有可疾排有
可着手輒生驩悅不知認賊爲子百劫千生轉轉
淪墜楞嚴所謂知見立知是無明本玄沙訶之爲
昭昭靈靈的禪是也波羅提未嘗不以在鼻辨香
在舌談論爲佛性然又曰不識喚作精魂傳大士
未嘗不曰欲識佛去處祇這語聲是然又曰錯會
不少因此一片本地風光無徑可尋無門可入纔

有所重便成窠臼故曰非有道不可言不可言卽道非有道不可思不可思卽道學者於口耳俱喪之餘言思路絕之際瞥地一下任伊說有說無說無爲真空說有爲妙有信手拈來何所不可未曾實證此理若靠些子知解爲本命元辰不知此知頭出頭沒時滅時生生死死流浪展轉不休於所謂無生法忍還相契否自己脚跟旣未點地一切談奇說異外道邪魔得以乘間而入不免任他播弄受他籠罩久久入于心肺雖其所爲市人嗤鄙懵

信于仇讐及其壯大有識欺給兄嫂三軍得意則
下亡虜窮谿之獸不避兕虎其事非易事理然也
以上諸語皆今書所不載按漢藝文志莊子五十
三篇郭象去其巧雜定爲三十三篇則今之所存
特十之四耳嚴書出象前其所引皆其逸篇可知
也子瞻謂讓王說劌盜跖漁父四篇爲僞撰羅勉
道者又疑刻意繕性亦復淺膚定爲二十六篇大
氏語意精麗居然別矣若君平所引其爲象所刪
無足疑者噫象誠僞識者哉

題殷汝餘十六阿羅漢卷

阿羅漢華言無生也蓋諸漏盡無復煩惱一性圓具多神變永解生死之紲不受後有之身非出世智人造化不能制者安能於欲流中逆舟尋源得大自在如此耶此十六尊者瞻其相好令人有超世出塵之想況汝餘雅承家學明體淨几時一展玩之亦熏脩之一助也

書李君煥卷

君煥從羅先生遊先生書深造自得語勉之君煥

過余而問曰君子之深造也非以造道耶其自得
之也非以得道耶余曰道不孤起繇心境生心相
無端道將安寄是以深造之際造無可造更奚置
其淺深自得之時自本無形復何容其得喪蓋一
理虛玄妙絕蹊徑聰者無以容其聽智者無以措
其知巧者無以象其形辯者無以容其口學者能
言下知歸當處便寂斯無造卽爲深造無得乃爲
真得苟其以能知爲造理認情識爲自心捏目生
華迷頭覓影種種之塗成空空之間彌遠可以

弘持法器遠紹宗風君煥蓋有意於余也故不避
多言謬爲決擇君煥其思之

題維摩畫像

我觀維摩經所說不二法門三十二維摩默然無
言說三十二人義皆墮一語一嘿分取捨則語與
嘿復成二如來三藏十二部不離舌根轉法輪言
說如空無所依衆生執著自生病苟其執著而不
化嘿然復入斷滅見剎那自悟圓明性嘿然與語
無差別不離當處常湛然何須斷取須彌界我今

稽首說偈言盡未來世衆生相一彈指洗千劫障
同證妙明寂滅海

題周府蘭亭書畫卷

此卷周憲王永樂初手摹定武諸本并龍眠圖而
刻之者也王心嗜法書投筆皆應繩矩而圖之位
置經營尤特雅緻當時深自闕惜故士大夫藉得
之見於格古論可攷也萬曆壬辰余奉璽冊封潁
川沈丘二郡王時周王相接甚恭濱行余郤其餽
王固語余曰一二文史刻自先代其毋辭余乃取

東書堂帖及此卷以歸久之念張君蘊甫工於八
法因輟以畀之夫定武原以唐摹入石此則轉相
規放乏書家出沒飛動神會意得之趣矣而側掠
努趯猶有古之遺法詎可忽諸學者一波撇間未
知置筆處而欲輕論昔人是未覩驪黃而遽言天
下之馬也

題小山玄賞

巨源擅海岱之秀爲寧城之裔婆挲丘壑錯綜今
古一時學士大夫杯酒過從題贈盈卷侍史彙而

葺之命曰小山玄賞一日持以示余夫神明之胄
食租衣稅孰不以微行出飲爲寄歡以擊筑彈碁
爲豪舉以彼沈酣於貴富約結於典制謂無復之
耳頃灌甫父子以經術名鬱儀兄弟以博雅著以
至游參飲河繡楊春草靡不玉振金聲墳鳴簷應
匪惟家寶抑稱國華已獨巨源於詞翰之暇脩竺
乾之業堆案者多旁行四句之書入門者半赤髮
白足之侶雖遺民淨社常參許飲之賓維摩丈室
不乏散花之女而其意固已遠矣是編乃賦乃文

亦玄亦史拂衣爲放則野人於小隱之中束帶而朝則君子於大夫之後式與汝歌非阿所好語云不知其人觀其友有不知巨源者當執此以求之

讀莊子七則

莊子一書以明道也儒之語道不離仁義禮樂莊子絕而棄之疑于不類夫瓦礫糠秕無非道妙獨仁義禮樂爲其所不載明乎非蒙莊之意矣何者仁義禮樂道也而世儒之所謂仁義禮樂者迹也執其迹不知其所以迹道何由明故不得已擯而

棄焉使人知道也者立象先超繫表而吾所挾者之無以爲也庶幾能進而求之也乎有如求之而契也然後知象無非真繫無非理而仁義禮樂亦可不必絕而棄之也已莊子之自言有之遠而不可不居者義也節而不可不積者禮也學者知其一說不知其又有一說幾何而不河漢其言也

老莊盛言虛無之理非其廢世教也虛無者世教所以立也彼知有物者不可以物物而覩無者斯足以經有是故建之以常無有不然聖人之業將

以成變化行鬼神而欲責之膠膠擾擾之衷其將能乎老子曰執古之道以御今之有夫曰今之有則古之爲無可知已而御有者必取諸無然則謂虛無廢世教可不可也是故舜之無爲而治非不治也以無爲治也禹之行其所無事非不行也以無事行也而昧者遂至清談廢事如晉宋人之爲斯失之遠矣莊子曰水不雜則清莫動則平鬱閉而不流亦不能清夫以廢事爲無爲是鬱而閉之而幾水之清者也

史遷言莊子詆訾孔子世儒率隨聲和之獨蘇子瞻謂其實予而文不予以尊孔子者無如莊子噫子瞻之論蓋得其髓矣然世儒往往牽于文而莫造其實亦惡知子瞻之所謂乎何者世儒之所執者孔子之迹也其糟魄也而莊子之所論者其精也譬之扁鵲見垣五藏而製爲方有學之者二人焉一不能見五藏病也而第執其方一如扁鵲之見垣五藏也而以意爲方不必盡出于師也則爲扁鵲者將善其守吾方者歟抑善夫以意自爲方者

歎釋氏之論訓恩者必訶佛詈祖之人夫以訶佛
詈祖爲訓恩則皈依讚歎者爲倍德矣又孰知夫
訶與詈者爲皈依讚歎之至也不然秦佚之弔嘗
非老聃矣栗林之遊又嘗自非矣而亦謂詆訾聃
周也可乎

史記言莊子與梁惠王齊宣王同時今其書所載
魏瑩卽梁惠王也又言莊子與魯哀公論儒則莊
子又與孔子同時矣孫叔敖相楚莊王孔子未生
而宜僚亦未嘗仕楚乃言仲尼之楚楚人觴之孫

叔敖執爵而立市南宜僚受酒而祭其前後舛錯往往有之學者嘗置疑于此然周固自言之矣寓言十九重言十七所謂寓言者借彼之人信此之意云耳夫惟信已之意而已則豈必其事之真哉史遷謂異累虛亢桑子之屬皆空語無事實大氐子虛烏有之流也而規規以時月覈之不幾于癡人說夢者乎雖然周微獨信已之意而已藉令學者因知名之非名而是非之非是非亦蒙莊之所以教也

子瞻辯莊子能尊孔子獨疑盜跖漁父則若真詆
孔子者至于讓王說劍皆淺陋不入于道反覆觀
之得其寓言之終曰陽子居西遊于秦遇老子其
往也舍者迎將其家公執席妻執巾櫛舍者避席
煬者避竈其反也與之爭席矣去其讓王說劍漁
父盜跖四篇以合于列御寇之篇曰列御寇之齊
中道而反曰吾驚焉吾食于十漿而五漿先餽然
後悟而笑曰是固一章也莊子之言未終而昧者
勦之以入其言耳故其祭徐君猷文云爭席滿前

無復十漿而五餽用爲一事今以寓言列御寇二
篇合而讀之真可涣然冰釋也今案列子第二篇
首載御寇饋漿事而卽綴以楊朱爭席正與子瞻
之言合豈子瞻作記亦因此而有寤邪大氏莊書
之奇自非後世所能亂其文詞格制之不同故可
望而知之也郭子玄云一曲之才妄竄奇說如闕
奕意脩之首危言游鳬子胥之篇凡諸巧雜十分
有三漢書秩文志莊子五十三篇卽司馬彪孟氏
所注是也言多詭誕或似山海經或類占夢書故

注者以意去取獨內篇衆家并同參以此說子瞻所謂昧者其然乎閑奕游鳬諸篇今不有

莊子崔譏本語多不同逍遙遊瞽者無以與乎文章之觀聾者無以與乎鐘鼓之聲下有眇者無以與乎眉目之好夫刖者不自爲假文屨夫齊物無物不然無物不可下有可于可而不可于不可不可于不可而可于可大宗師乘東維騎箕尾而比于列星下有其生無父母歟登遐三年而形遯此言神之無能名者也成然寐蘧然覺下有發然汗

出造適不及笑獻笑不及排安排而去化乃入于寥天一作造敵不及笑獻笑不及鼈安排而造化不及眇眇不及雄漂滌雄漂滌不及簾筮簾筮乃入于謬天一在宥焉知曾史之不爲桀跖嚆矢也下有有無之相生也則甚曾史與桀跖皆有無也又惡得無相轂也其不同者往往有之相傳外雜篇多郭象所刪脩豈此類耶抑他好事者妄爲點竄如此耶

嚴君平作老子指歸其稱引莊子者多矣曰任車

未虧僮子行之及其傾覆也顛高墮谷千人不能
安卵之未剖也一指摩之及其爲飛鴻也奮翼凌
雲曾繳不能達也胎之能乳也一繩制之及其爲
壯也羅網不能禁也虎也執羣獸食牛馬劙戰不
能難也故漣滴之流久久而成江海小蛇不歿化
爲神龍積微之善以至吉祥小惡不止乃至滅亡
又曰我之所以爲我者豈我也哉我猶爲身者非
身身之所以爲身者以我存也而我之所以爲我
者以有神也神之所以留我者道使然也又曰道

之所生天之所興始于不始生生于不生存存
于不存亡亡于不亡又曰夫起福生利成功遂事
備物致用使人大富天下奢僭財貨不足民人愈
醜福滿山澤金玉成積國愈不安民益少利飾智
相愚以詐相要防隄邪淫姦宄之路密分別同異
是非之變衆則國家昏而政事衰作方遂伎彫琢
文彩奇變異怪以褒有德以別尊卑巧故滋起俊
出愈奇令速賞深罰峻刑嚴斲肌膚斷四肢疏遠
不隱親近不和罪至夷滅賞至封侯天地振栗盜

賊愈多又曰夫饑而倍食渴而大飲熱而投水寒而入火所苦雖除其身必死胸中有痕不可鑿喉中有疾不可剝也蠚蚕著面不可射也蟻蟲著身不可斫也又曰夫日月之出入也同明人之亥生也同形春秋之分也同利玄聖之與野人也同容通者之與閉塞也同事道士之與赤子也同功凡此數者其中異而外同非有聖人莫之能明又曰夫陰而不陽萬物不生陽而不陰萬物不成天地之道始必有終終必有始又曰夫嬰兒未知而患

信于仇讐及其壯大有識欺給兄嫂三軍得意則
下亡虜窮谿之獸不避兕虎其事非易事理然也
以上諸語皆今書所不載按漢蓺文志莊子五十
三篇郭象去其巧雜定爲三十三篇則今之所存
特十之四耳嚴書出象前其所引皆其逸篇可知
也子瞻謂讓王說劖盜跖漁父四篇爲僞撰羅勉
道者又疑刻意繕性亦復淺膚定爲二十六篇大
氏語意精麤居然別矣若君平所引其爲象所刪
無足疑者噫象誠僞識者哉

焦氏澹園集卷之二十三

經籍志論

四十九首

制書部

古之聖哲無意於文也理至而文從之如典謨訓
誥是已然或謂臯夔旦奭代爲屬筆蓋間有之若
梁武唐文贍於辭學至與寒畯之士競爲雕蟲何
其小也我聖祖投戈講稅間有撰造朝出九重
暮行四海風動草偃曉然如推赤心置於人腹中
竊伏而讀之亹亹乎如家人父子提耳以命唯恐

其不盡也如導師之於弟子唯恐其不達也書之
贊敷言曰天子作民父母以爲天下王嗟乎此非
真有父母之心者孰能爲之而文殆不足言矣雖
然蹟其震越渾鍾魁奇碩大雖以凌跨百代而軼
駕三王其何讓之有列聖代興著作相望今備
列首篇至於辭苑之編摩一稟指授私家之紀載
識其小大莫不有文武之道焉咸綴末簡以資憲
章

經部

易

蜀張生有言連山天易也歸藏地易也有灋數而未有書周易人易也始有書矣而未詳於義也商瞿受易孔子五傳而至田何雖有異家一以象數爲宗自王弼之說出陰陽占筮皆昧爲術數之流而易晦矣子曰易有聖人之道四焉非直以其辭而已蓋嘗譬之象數者水之源木之本也卦有定名則水出木生而某水某木可知已六爻則其派與枝葉也派之通塞枝葉之華悴則爻之吉凶也

辭則水之經木之譜也學者執經與譜而不復尋其源本謂學易可乎世儒王主理鄭主象二家局見今古所同顧承學左袒王氏者爲多繇象無筌蹄可尋而理則管蠡可測折楊黃華嗟然而笑無足怪也今並列於篇以俟采擇

書

古者言爲尚書事爲春秋蓋左右二史分職之秦置尚書禁中通章奏漢詔命在尚書主王言故秦漢因以名官七略曰尚書直言也而以爲上古之

書者失之矣始伏生授晁錯書二十八篇漢魏數百年間諸儒所治僅此耳至東晉梅曠增多二十五篇卽所稱壁藏書也攷漢志有古經十六卷以其後出別於經不以相溷其慎如此唐人不能深攷猥以晚晉雜亂之書定爲義疏而漢魏專門之學遂以弗廢近吳幼清叙錄一出乃悉還伏生之舊而趙子昂歸熙甫之流各著爲書靡不懸合蓋渙然有當於心夫古書散於後人至不可勝數其文辭格制之異固可望而知也朱元晦嘗深疑之

而未及是正今學官旣有著令學士大夫往往循習不辨遂使唐虞三代之遺掇拾於故老者盡亂於僞人之手而不覺可勝惜哉故於臚列諸家而特著其事俟廣石渠白虎之義者有所考鏡焉

詩

詩三百十一篇亡其辭者六攷之儀禮皆笙詩也笙詩有譜以記音節而無其辭非軼之也春秋諸侯卿大夫賦詩道志率無所擇至攷其入樂自邯鄲幽無一在數享之用鹿鳴鄉飲酒之笙由庚鶡

巢射之奏騶虞采蘋靡匪雅與南也然後知南雅
頌之爲樂無疑矣故曰以雅以南以籥不僭季札
觀舞象箚南籥者南籥二南之籥也箚雅也象舞
頌之維清也文王世子又曰胥鼓南則南之爲樂
益明已竊嘗論他經可以詁解而詩當以聲論後
世不得其聲而獨辭之知韓毛諸家於鳥獸蟲魚
之細竭力以爭而問其音節不能解也古者審聲
以知治作樂以成教者其亦幾於絕矣夫以聲感
者於性近而以義求者離性遠學詩而不知此也

與耳食何異今錄其見存諸編令學者與樂部類而觀焉

春秋

孔子西觀周室令子夏等十四人求周史記得諸國寶書而春秋作焉秦處曰書非史記周圖仲尼不采其自謂述而不作也以此漢初博士唯公羊一家宣帝益以穀梁至平帝時左氏始立大氏左氏傳事不傳義是以詳於史而事未必覈公穀傳義不傳事是以詳於經而義未必當及乎後儒保

殘守陋往往主傳而賓經失乃彌甚夫聖人之作
經豈冀有三子者爲之傳耶無三傳經遂不可明
耶善乎趙鵬飛之言學者當以無傳求春秋不可
以有傳求春秋得之矣說經者總若干家而余得
並列於篇

禮

漢初禮經出魯淹中河間獻王得而奏之乃高堂
生獨傳十有七篇卽今之儀禮也后蒼從堂講業
尋以授戴德兄弟及沛人慶普後三家並微鄭玄

明小戴之學自爲之注書乃盛行喪服一篇相傳
出於子夏而獻王又從李生得周官書以冬官闕
取考工記足成之顧不知冬官未嘗闕也蓋冢宰
六屬屬六十今冬官之屬才二十八而五官數各
有羨天官六十有三地官七十八春官七十夏官
六十九秋官六十六遺編斷簡錯出乃爾取其羨
數還之冬官不獨百工得歸其部而六官譌舛因
可類攷亦足快矣儀禮多軼永樂中御史劉有年

劉元州人
見一統志
獻逸經十有八篇時未加表章旋就湮

沒夫以古經出千百世之後而不爲寶惜劉歆所謂杜道餘滅微學寧獨漢人而已余深慨之特附著於篇今好古者有所聞焉

樂

漢志以禮樂著之六統皆非孔氏之舊也然今所傳三禮爲漢遺書而樂六家者不可復覩矣竇公大司樂章旣見于周禮河間獻王之樂記亦錄于小戴則古樂已不復有書而諸史相沿至取樂府教坊琵琶羯鼓之類以充樂部而欲與聖經埒可

乎雖然今之樂猶古之樂也儒者覩禮樂崩壞痛爲惋惜不知賈人之鐸諧黃鐘之律庖丁之刀中桑林之舞牧童之吹葉閨婦之鳴砧悉闇與音會樂固未嘗亡也宋李照胡瑗改鑄鐘磬冀還之古蜀人房庶蓋深非之謂上古氣與聲樸後世稍稍更易而其意自存金石鐘磬也易爲方響絲竹琴瑟也易爲箏笛匏笙也攢之以斗墳土也變而爲鼙擊鼓而爲革貫板而爲木于用亦甚適已泥者必指廟樂鏤鐘鏤磬爲正而槩謂胡部齒部爲淫

是欲反盃孟子俎豆更榻按爲簾席亦何益哉藉第令由今之器寄古之聲去其愆懲靡曼而一歸雅正非識禮樂之情者不能也語具樂志中今備錄其書以俟考定

孝經

孔子爲曾子言孝道門人錄之謂之孝經遭秦燔書爲河間顏芝所藏漢除挾書律芝子貞始出之長孫氏江翁后蒼翼奉張禹所說皆十八章後復出古文二十二章劉向比量二本除其煩惑仍以

十八章爲定五代兵燹二本舊注多軼周顯德中新羅獻別序孝經至邢昺乃合元行冲所疏爲正義以行顧聖言簡嚴易直而天人之道備非一家所能究也故並著之而以緯書綴於篇末

論語

論語孔子應答弟子時人語而柳宗元以爲曾子之門人記之者也物理論曰論語聖人之至教王者之大化砥行之卓范造性之微言鄉黨則有朝廷之儀聘享之禮堯曰熙有禪代之事亹亹乎無

弗備矣漢初有齊魯二家張禹本授魯論晚講齊論因合而攷之除去齊論問王知道二篇從魯論二十篇爲定當世重之後有孔安國馬融鄭玄陳群王肅周生烈何晏之流爲注疏者數十家近代疏解至不可殫述盡測管闕時有所中不可弗廢也今悉著之而他仲尼遺言類附於篇

孟子

孟子著書崇仁義叙萬類趙岐所稱帝王公侯遵之可以致隆平頌清廟卿士大夫蹈之可以尊君

父立忠信守志厲操者儀之可以崇高節抗浮雲
非虛也前史夷於諸子莫爲甄別孝文時與論語
孝經爾雅同置博士其識卓矣而旋卽罷去趙宋
設科語孟並列注疏之家常相表裏學者咸尊曰
孔孟不能爲軒輊也其外書四篇不能闇深疑爲
後人所假托今廢不存

經總解

孔子手自刪述者六帙而已唐定注疏始爲十三
經宋改九經國朝罷周官儀禮孝經春秋三傳

不立而以四子五經 制詔頒行之蓋不欲以脫

遺影響之文疑誤來者而令歸雅正厥意美矣漢

石渠白虎大集名儒講議經術時稱獨盛我 朝

篤意儒雅方駕漢代而不啻過之書與春秋 聖

祖親相指授作爲成書

書傳會選春秋本末

至永樂中又悉

爲大全播於寰宇念北方書籍鮮至時優賜之文
教彬彬風行雷動有不奮興於學者非夫也故諸
經著述日新且盛今與前籍旣部分之而貫穿群
言難於離析者別爲總解以附此篇

小學

古者八歲入小學習六甲四方與書數之秩成童而授之經迨其大成也知類通達靡所不晰而小學始基之矣爾雅津涉九流標正名物講秩者莫不先之於是又有訓故之學文字之興隨世轉易讖舛日繁三蒼之說始志字灋而說文興焉於是有关傍之學五聲異律清濁相生孫炎沈約始作字音於是又有音韻之學保氏以數學教子弟而登之重差夕桀句股與九章並傳而鄉三物備焉於是

有筭數之學蓋古昔六秩乘其虛明肄之以適用而精神心術之微寓焉矣古學久廢世儒采拾經籍格言作爲小學以補亡夫昔人所嘆謂數可陳而義難知今之所患在義可知而數難陳孰知不得其數則影響空疎而所謂義者可知已顧世所顯行不能略也今悉次於篇以備小學

史部

正史

古天子諸侯必有國史以紀時事孔子西觀周室

論史記舊聞興于魯而作春秋其蹟可攷已嬴秦
史職放絕漢興馬記班書始變編年之體後之爲
史祖之顧二子皆因父業緒而成書况遷旣收功
于商毅固仍丐馥于達歆語云千金之裘非一狐
之腋非虛言也繼是作者代興勝劣互異然莫不
鉤深故府囊括辭林一代興衰賴以攷見儻謂遷
固亡而無史學不亦謬乎漢志秩文原無史部但
以列于春秋近世史籍日多述作異體總之成一
家之言難於附載也輒依其世次敘而綴之以備

正史

編年

述史者體有不一而編年紀傳其槩也編年者以年繫事詳一國之治體蓋本左氏紀傳者以人繫事詳一人之事蹟蓋本史遷大較各有所長而編年爲古矣何者紀表志傳自爲篇章不無煩複故蕭穎士謂子長創爲不合典訓嘗深非之然左氏依經爲傳而國語一書國別事殊或越數十年而竟其義亦知事詞散出難於綴屬而自相錯綜如

此矣荀悅袁宏于寶褚裒之著作一程春秋乃若通鑑一編通群哲之歸趣總百代之離詞雖其津涉九流鉛鍵六秩而實王侯之龜鏡經濟之潭奧也今取其體裁相近者並列於篇以具當代得失之林焉

霸史

孔子卜陽豫之卦剗心著作集百二十國書而成春秋然則古者國皆有史不獨天子矣周禮外史掌四方之事達四方之志諸侯之書則書國中之

事以達于王朝者也而天子又時巡以內之內史
以董之故列國之史多藏周室孔子觀于周而論
次史記其采擷者弘已後世史學中絕唯一統之
代率修闕文備觀聽至于群雄割據多未暇皇纂
述之事也然或推奉正朔或假竊名號其匡定之
偉略制馭之密謀不無可觀者當時方聞之士私
相綴述以示勸戒蓋往往有之通人達士必博采
廣覽以酌其要故備而存之謂之霸史

雜史

前志有雜史蓋出紀傳編年之外而野史者流也
古天子諸侯皆有史官自秦漢罷黜封建獨天子
之史存然或屈而阿世與貪而曲筆虛美隱惡失
其常守者有之於是巖處奇士偏部短記隨時有
作冀以信已志而矯史官之失者多矣夫良史如
遷不廢群籍後有作者以資采拾奚而不可但其
體製不醇根據踈淺甚有收摭鄙細而通於小說
者在善擇之而已

起居注

史官記注時事略有數等書榻前之曆置有時政
記載柱下之見聞有起居注類例則爲會要粹編
則爲實錄總之以待異日之采擇非正史也昉于
蕭梁歷世靡缺宜夫執簡而書盡錄摭實借箸之
筭無不目覩而來鵠于此乃有三歎焉謂宰臣密
畫史官不聞次第周行檢錄制奏與冗吏同工而
已嗟乎史者當國之龜鏡萬載之眉目也以彼雲
諷波訪勑編列筆猶難勝其任而顧令失職如此
哉會要列於故事二者舊自爲部今合爲一而先

後仍以類從云

故事

古者百司政典藏於官府各修其職守而弗忘周官御史掌治朝之法太史掌萬民之約契與質劑以逆邦國之治蓋賦事行刑必問遺訓而咨故實史職尚已漢建武初政鮮成憲朝無故老識者慮之獨侯霸明習故事收錄遺文一時倚以爲重後世條流派別制度漸廣雖未必悉能經遠而各有救於淪敝亦一時之良也惜隨代湮沒十不一存

今據所傳者部而類之謂之故事

職官

上世官修其方故物不抵伏後世弗安厥官其方
莫修而職業舉以放廢夫方者書也究其原本所
思營者悉書之法術具焉令居是官者奉以周旋
古之制也周官三百六十屬官各有書小行人適
四方則物爲一書至五書蓋將有行也舉必及三
惟始衷終依據精審斯其厝置也無不當者今史
策中漢官解詁漢官儀晉公卿禮秩故事唐六典

皆其類也但官曹名品撰錄甚繁其猥瑣鄙細者
蓋多有之特刪其存而可覩者爲職官篇

時令

禮有之夏時曰夏四時之書也其存者夏小正是
己月令雖晚出而實古之遺法蓋王政之施歛民
用之出藏與夫攝養種植隨俗嬉遊亦可考見承
平之遺風故其書代有作者嘗試丹青衆言憑凡
以驗四時物色慘舒榮槁粲然如將接之而其宏
鉅者雖以磅礴天地呼吸陰陽而成歲功可也前

史類入農家顧諸籍鱗次非專爲農設今特立歲時一條從中興館閣例云

食貨

洪範八政食貨先之非生人所至急乎顧自養之資少役生之路繁風流波蕩日以彌甚於是明珠翠羽無足而馳異石奇花飛不待翼遠畜未名之貨競收罕至之珍而一罹歲凶卒無療於饑渴則何益矣昔醇人未滴情耆踵寡奉牛贍已差不爲勞一夫耕則餘餐委室匹婦織而兼衣被體鶴犬

聲聞而老死不相往來豈非聖人所深羨者乎在投珠捐璧之主倡之而已今編列諸籍勸誠具存謂之食貨篇

儀注

孔子之適周也於柱下史學禮焉嘆曰大哉聖人之道洋洋乎禮儀三百威儀三千而與弟子言仁也曰克己以復禮蓋宮室得其度量鼎得其象味得其時樂得其節車得其式鬼神得其饗喪紀得其序辨說得其黨官政得其施凡衆之動得其宜

禮備而仁在矣後世禮教放失遺經出魯淹中者
什不得一然明君察相因時立制制定而民安之
卽謂禮至今存可也漢興叔孫通曹褒雜定其儀
唐宋以來斟酌損益代有不同而適物觀時類有
救於崩敝亦何必身及商周揖讓升降於其間乃
爲愉快乎哉故具列而叙之其謚法國璽原出他
部余以謂禮之類也特改而傳著於篇

灑令

漢初蕭何定律令張蒼制章程叔孫通定儀法一

代之制粲然矣晉令甲九百餘卷杜預賈充刪采
其要有律有令有故事各還官府儻所云章程者
非乎國家創制立法莫重於此史稱魏相明經有
師法好觀漢故事及便宜章奏故知前事不忘後
事之師也其可忽諸舊史有刑法一目而漢名臣
奏事魏臺雜訪貢舉監學役法參錯其間近於不
倫今更名法令以律令爲首而諸條皆檢括之其
職官儀注又以其重大別出云

傳記

古者史必有法大事書之策小則簡牘而已至於流風遺蹟故老所傳史不及書則傳記興焉如先賢耆舊孝子高士列女代有其書卽高僧列儼鬼神怪妄之說往往不廢也夫以六經之文皎如日月諸家異學說或不同况乎幽人處士巖居川觀而以載當世之務者乎然或具一時之所得或發史官之所諱旁搜互證未必無一得焉列之於篇以廣異聞

雜史傳記皆野史之流然二者體裁自異雜史紀志編年之屬也紀一代若一時之事傳記列傳之

蜀紀一人之事外此若小說家與此二者易溷而實不同當辨之

地里

古郡國計書上於蘭臺蓋地志之屬往往在焉尚書九州之志謂之九丘丘聚也言九州所有皆聚此書也周官別山川分圻界條物產辨貢賦六卿分掌之而總於冢宰太史以典逆冢宰治其書蓋昔之史職如此漢承百王之末壞地變改劉向始略言其分域丞相張禹使屬潁川朱贛條其風俗而宣究之後世地志之濫觴也摯虞畿服經至百

七十卷可謂備矣而世罕傳後人因其所經自爲
篡述卽未必成一家之體而夷險之蹟區域之界
土風之宜星經之分考覽者率有資焉悉次左方
以補圖經之闕

譜系

古爲春秋學者有年歷譜牒桓譚云太史公三代
世表旁行表上並效周譜則譜系所從來矣古小
史主次序先王之世昭穆之繫述其德行矇瞽主
誦詩若世系以戒勸人君故國語曰工史書世宗

祝書昭穆宗廟之有昭穆以次世之長幼等胄之
親疏若此者凡以教之世而爲之昭明德廢幽昏
其意遠矣江左以來譜籍漸盛太元中賈弼篤好
簿狀廣集諸家撰十八州百十六郡合七百十二
卷凡諸大品略無遺闕斯爲獨備嗣後劉湛王儉
王僧孺路敬淳柳冲韋述世多稱之大氏周漢之
敝智役愚魏晉之敝貴役賤甚至三公之子傲尤
棘之家黃散之孫蔑令長之室卽權力如文皇不
能夷崔幹于寒畯他可知也迨至中葉此風都廢

公靡常產士無舊德冠冕輿阜混然莫分則又甚矣夫氏族勲恪史之流例故區而列之以備覽焉

簿錄

記有之進退有度出入有局各司其局書之有類例亦猶是也故部分不明則兵亂類例不立則書亡向欲剖判百家條綱粗立自是以往書名徒具而流別莫分官賸私楮喪脫幾盡無足怪者嘗觀老釋二氏雖歷廢興而篇籍具在豈盡其人之力哉二家類例既明世守彌篤雖亡而不能亡也古

今簿錄勝劣不同鄭樵彈射不遺餘力而倫類溷
穢或自蹈之目論之譏誰能獨免今備列之而別
爲糾謬一卷以附末篇

子部

儒家

子語子夏曰文爲君子儒無爲小人儒天子諸侯
曰君卿大夫曰子孔子非以欲此名也冀其并包
兼容而勿區區自營之謂也子夏學不見大而硜
硜於言行之信果此與細民何異荀卿氏有言儒

耨耕不如農夫斲削不如工匠反貨不如商賈譚
詞薦樽不如惠施鄧析若夫商德而定次量能而
授官使賢不肖皆得其位能不能皆得其官萬物
得其宜事變得其應四海一家歸命輜湊蓋九流
皆其用也豈與小道曲學僅僅自名者同乎哉史
遷敘諸家儒者才居其一彼未得其真而卽所覩
記者當之故以寡要少功爲詬病嗟乎此不敢以
望子夏何論君子古今作者言人人殊稍爲綴敍
而或不純爲儒也亦備列之殆益明儒之爲大也

已

道家

九流唯道家爲多端昔黃老列莊之言清靜無爲而已煉養服食所不道也赤松子魏伯陽則言煉養而不言清靜盧生李少君則言服食而不言煉養張道陵寇謙之則言符籙而不言煉養服食迨光庭以來至近世黃冠獨言經典科教蓋不唯靜之旨趣悽焉無聞而煉養服食之書亦未嘗傳而問焉矣而悉宗老氏以託於道家者流不亦

謬乎夫道以深爲根以約爲紀以虛極靜篤爲至
故曰虛者道之常因者君之綱此古聖人秉要執
中而南面無爲之術也豈有幾於長生哉然以彼
翛然玄覽獨立垢棼之外則乘雲御風揮斥八極
超無有而獨存特餘事耳昧者至棄本逐末誕欺
迂怪因而乘之假託之書彌以益衆嗟乎世惟卓
識殫洽者能辨學之正僞彼方士非研精教典獨
會於心烏能知其純駁擇善而從也世行道藏視
隋唐宋著錄尤汎濫不經今稍刪次之如右

釋家

世之與釋氏辨者多矣大氏病其寂滅虛無毀形
棄倫而不可爲天下國家也夫道一而已以其無
思無爲謂之寂以其不可觀聞謂之虛以其無欲
謂之靜以其知周萬物而不過謂之覺皆儒之妙
理也自儒學失傳往往束於形器見聞而不知其
陋一聞語上者顧以爲異說而咻之昔齊國守其
神聖之法傳世數百年一旦田氏據國并其神聖
之法而盜之徒知田氏之有齊不知神聖之法本

齊之故物也今之爲儒佛辨者大率類此故學者與其拒之莫若其兼存之節取所長而不蹈其敝如雕題卉服之倫合沓內嚮而王者巍然開明堂以臨之詎不足以明大一統之盛哉昧之遏糴曲防以封畛自域者狹亦甚矣漢初佛未盛行九流不載至范蔚宗始述之今琳宮梵筭殆徧天下不能使其泯泯也故因其籍而刪次以列於篇

墨家

墨氏見天下無非我者故不自愛而兼愛也此與

聖人之道濟何異故賈誼韓愈往往以孔墨並名
然見儉之利而因以非禮推兼愛之意而不殊親
疎此其敝也莊生曰墨子雖獨任如天下何其大
蔽而難遵有以也夫墨子死有相里氏之墨相芬
氏之墨鄧陵氏之墨世皆不傳晏子春秋舊列儒
家其尚同兼愛非樂節用非厚葬久喪非儒明鬼
無一不出墨氏柳宗元以爲墨子之徒尊者其事
以增高爲已術者得之今附著於篇

法家

古有九流輓近世幾於絕矣而墨縱橫名法爲甚
其篇籍多軼以此夫三家於理不衷於用非亟固
也至法也者人君所以紀綱人倫而遏絕亂略顧
可一日廢哉百家蠭起皆率其私智自附於聖人
以譁世而惑衆然其失繇各奮其私智而其長蓋
或出於聖人在善用之而已不然猶衝委馭四牡
橫轡而欲以和鑾節奏赦皇路之謫頃其可幾乎
今仍列其書以備法家

名家

名家之凡三有命物之名有毀譽之名有况謂之
名蓋古者名位不同事實亦異孔子曰必也正名
乎名不正則言不順言不順則事不成論治者不
覈其名實御衆課功反上浮淫而詬功實難以爲
國矣晉魯勝曰荀卿莊周皆非毀名家而不能易
其論有以也至舛駁不中之失並見於篇俟博雅
者折衷焉

縱橫家

孔子曰誦詩三百伎於四方不能專對雖多亦奚

以爲蓋謂言有其道也前代若呂相之絕秦子產之獻捷魯連倜儻以全趙左師委曲而悟主斯亦何惡於詞哉乃蘇張睢首得其術而以召敗非術之罪也史言魏徵諫諍靡出弗從而其初實學縱橫顧用之者如何耳戰國策或曰國事或曰短長或曰事語或曰長書前志列之史家晁氏謂其紀事非盡實錄附於縱橫者近是今從之

雜家

說文五采合曰襍從衣從集隹聚木上亦其義也

人情美繡而惡襍顧繪事必兼五色采色具而繡成若之何其惡之前史有雜家譬之製錦然巨細奇正典常俶詭并苞兼總而王治貫焉矣微獨諸子而有之易之興也蓋非其雜物撰德不備皆是物也第明天地之性則神怪不能感知萬物之情則非類不能固雖昆蟲水草櫨梨橘柚縮脣澁齒日陳於其前特以養生則不能勝五穀也在學者精擇之而已

農家

聖王播百穀勸耕稼以足衣食非以務地利而已人農則樸樸則易用易用則邊境安而主勢尊人農則少私義少私義則公法立人農則其產復其產復則重流徙而無二心天下無二心卽軒轅凡違之理不過也今大江以南土沃力勤甲於寓內而鴻臚瘠空西北爲甚雨澤不時輒倚耜而待槁靈潦一至龍蛇魚鼈且據皇隰而宮之豈獨天運人事有相刺戾哉斯民皆窳偷惰而教率之者踈耳古有農官顓董其役而田野不闢則有讓播殖

之宜蠶繅之節如管子李悝之書多具之惜不盡傳姑列其見存者於篇

小說家

張衡之賦二京也曰小說九百本自虞初知古秘書所掌其流實繁班固列之諸家見王治之悉貫與小道之可觀其言韙已何者陰陽相摩古今相嬗萬變擣起嵬瑣弔詭不可勝原欲一格以咫尺之義如不廣何故古街談巷議必有稗官主之辟之菅蒯絲麻悉無捐棄道固然也余故仍列入

蓋立百體而馬繫乎前嘗聞之蒙莊矣

兵家

兵之興也或謂權輿於涿鹿然紫太二垣將衛環
時將軍羽林棓槍旗弧騎官陳車鉄鍼積卒靡不
錯列於經星之次天垂象見吉凶其來尚已蓋木
行惟文金行惟武春序文秋序武經事文緯事武
東西相反而不相無也代之下也司馬法廢矣然
本陰陽者推德勝順時日以制敵尚伎巧者習手
足便器械以立勝識形勢者雷動風舉雜合背鄉

務變化輕疾以信威至委以鈍刃而無瓦解之心
則壹稟於人和誰能易之古法不同具列篇籍神
而明之則在其人

天文家

天地之化運諸氣天地陰陽之氣隨乎時聖人與
時消息發歛而常守乎平出則育物入則復命于
變萬化而不離乎出入之門故能從八風之順守
二極之中而適八候之平也蓋五星有羸縮圜角
日有薄蝕暉珥月有盈虧側匿之變王政有違天

下禍福變移所在皆應焉其重如此班史以日暘五星之屬列天文薄蝕彗孛之比入五行夫七曜等耳而分爲二志疑於不類今一定爲天文篇

歷數家

古今善治歷者三家漢太初以鍾律唐大衍以蓍筭元授時以晷景三者之中晷景爲近而其久也類不能無忒則隨時刊定不可不講也劉洪有言歷不差不改不驗不用李文簡歎爲至言顧必有專門之裔明經之儒精筭之士如班氏所稱乃足

任之有虞羲和與四岳九官同重而後世至以文
史星歷介於卜祝之間蓋疇人子弟貿貿然不測
其原抑已久矣夫閏以正時時以序事事以厚生
其在周官皆史職也故錄見存諸書爲歷數篇以
俟攷焉

五行家

古有大事以八命贊三兆三易三夢之占夫龜具
陰陽四方之體蓍備天地六子之象泊然無欲也
乃夢則思爲不作而神與通之占者以此明吉凶

徵得喪惡能匿諸後世諸術繁興非盡古法然風角鳥占堪輿壬遯與夫人倫祿命之類雖其浮淺皆得古人之一察故巧發奇中往往有之舊史雜出略無覈叙今總列於五行而其中又以類從焉管輅有言物不精不爲神數不妙不爲術得數者妙得神者靈而其卒也第發篋書皆世所常有嘆曰世患無才不由無晝諒哉

醫家

醫經昉於素問經方原於本草七略分二家寔王

官之一守也許嗣宗曰醫特意耳脉候幽而難明
吾意所解口不能宣也虛著方劑於世何益顧自
六塵伐性七竇移情衛生虧攝機速蹙痿求緩齡
於金液假息於銀丸則五色所書鴻寶所錄又可
盡廢耶第方匪對症藥或誤人語曰疾不治得中
醫非虛言也代歷古今篇籍猥衆今稍稍次之爲
醫家

藝術家

易曰言天下之至贊而不可惡也昔曾子論道贊

其大而歸籩豆於有司以反本也然語於道器之際則離莊子至以稗稗瓦礫悉名之道其說靡矣君子顧有取焉故至人獨稟全懿而偏長小秕足以當緩急而狎世機亦取而折衷之未嘗惡其牘也史有秕術篇今甄列如前儻所稱猶賢於已者乎

類家

流覽貴乎博患其不精強記貴乎要患其不備古昔所專必憑簡策綜貫羣典約爲成書此類家所

續起也自魏皇覽而下莫不代集儒碩開局編摩
乃私家所成亦復猥众大都包絡今古原本始終
類聚臚列之而百世可知也韓愈氏所稱鉤玄提
要者其謂斯乎蓋施之文爲通儒厝於事爲達政
其爲益亦甚鉅已前史有雜家無類書近代纂述
叢雜乃爲別出要之雜家出自一人類書兼總諸
籍自不容溷也他如嘉祐謚法淳熙孝史乾道翰
苑羣書雖馳騁古今而首尾一事自歸其部此不
復列云

集部

制詔

王者淵默黼辰而風行四表其唯制詔乎故授官選賢則氣含風雨誥戎變伐則威凜淳雷肆赦而春日同溫敷法則秋霜比烈蓋文章之用極於此矣兩漢詔令最爲近古然敷鄧禹矣霸體例有乖難於行遠武帝以淮南多士屬草相如良有謂也後世材者弗任而任不必材欲令騰義飛辭惜服遐邇不可得已顧王治人心十於綸繩考覽者不

能廢也古惟誥誓近有詔有令有制敕有策書名
日小異總爲王言今悉列之爲制詔篇

表奏

古人臣言事皆稱上書嬴秦改書爲奏至漢章奏
表議定爲四品其流一也三代君臣面相獻替而
伊周書誥已益簡牘迨世益下簾遠堂高所以披
見情愫覺寤主心者賴有此耳世稱左雄胡廣奏
議第一文舉孔明志暢辭美不獨身文所在抑亦
國華繫之故足重也世人經世無術競於詆訶吹

毛取瑕次骨爲戾夫能闢禮門以懸規標義路而植矩自令踰垣者折肱捷徑者滅趾亦何必躁言醜句詬病爲切哉書曰辭尚體要體要並懿辭則何觀漢志秕文靡細不錄至於經國樞機闕而不纂乃各有故事備于司存也余恐隨世遺失特具列之綴於制詔之次

賦頌

詩有賦比興而頌者四詩之一也後世篇章蔓衍自開塗轍遂以謂二者於詩文如魚之於鳥獸竹

之於草木不復爲詩屬非古矣屈平宋玉自鑄偉辭賈誼相如同工異曲自此以來遞相師祖卽無音累氣時或不無而標能擅美輝映當時者每每有之悉著於篇語曰登高能賦可以爲大夫學者吟諷廻環可以慨然而賦矣

別集

漢初著作未以集名梁阮孝緒始有文集錄隋志因之至今衆士慕尚波委雲屬不可勝收矣顧兵燹流移百不存一以彼掉鞅辭場風雨生於筆札

金璧耀乎簡編豈不謂獨映一時垂聲千古哉而
一如烟雲過眼轉盼以盡以此知士之所恃不在
徒言也然而名談瑋論闡道濟時者蓋間有之今
具列於篇仍爲別集

總集

古者人別爲集蓋起於東漢然軌轍不同機杼亦
異各名一家之言摯虞苦其凌雜彙爲流別後世
述之因爲總集如昭明所選是已昔人有言文之
辯訥升降繫焉鑒之頗正好惡異焉作之固難解

亦不易故長編巨軸半就湮沒而其僅存者又未
盡雅馴可觀蓋亦有幸不幸焉今次其時代總爲
此篇